

Jangan Gadai Masa Depan Negara Dengan Beri Peluang Kepada Pembangkang - Dr Subramaniam
Bernama
6 September, 2012

PUTRAJAYA, 6 Sept (Bernama) -- Rakyat diingatkan supaya tidak sesekali menggadaikan masa depan negara dengan cuba memberi peluang atau menguji keupayaan pembangkang memerintah negara.

Menteri Sumber Manusia Datuk Seri Dr S. Subramaniam ketika memberikan ingatan itu berkata sebarang keputusan salah pada pilihan raya umum ke-13 nanti pastinya akan memberi kesan mendalam kepada rakyat terutamanya generasi akan datang.

Justeru, katanya rakyat perlu memastikan keputusan yang dibuat akan membolehkan kerajaan sedia ada meneruskan segala agenda pembangunan menuju ke arah negara maju selain mengekalkan kestabilan dan keamanan negara.

"Jangan membazirkan peluang ini dan membuat keputusan yang salah. Lepas itu kita akan menyesal dengan keputusan itu. Ia seolah-olah menggadaikan masa depan generasi dan warisan kita akan datang," katanya ketika berucap pada majlis rumah terbuka Aidilfitri Kementerian Sumber Manusia di sini Khamis.

Dr Subramaniam yang juga Timbalan Presiden MIC berkata keupayaan kerajaan Barisan Nasional(BN) membawa kejayaan berterusan dalam pelbagai sektor terutamanya ekonomi, sosial dan politik terbukti di seluruh dunia.

-- BERNAMA

Copyright © 2012 BERNAMA

Source: <http://www.bernama.com/bernama/v6/bm/newsindex.php?id=692524>